



Centimetres

Kodak Color Control Patches



7-684.5544
8P5
4

先恭勤公年譜卷四

男彬
男桐
男恭
男輯



咸豐三年癸丑六十七歲

正月以

宣宗成皇帝三周年大祭府君奉

派恭赴

慕陵行禮 不孝桐 亦奉院長派赴行禮得侍往

上元節

乾清宮廷臣宴府君與焉時以赴

陵行禮未歸未與宴仍

賜珍玩文綺御墨磁器等件

二月以

孝和睿皇后梓宮奉安

昌西陵府君奉

命前往敬謹將事差旋

賞加二級

三月充會試正考官得士吳鳳藻等二百三十七人 府君入闈後悉心校閱試卷每晨起必

焚香默祝願得真才爲

國家備棟梁選撤棘後諸生來謁各授儒門法語一卷勸以植品立行爲經世學毋負讀書初志 四月充

殿試讀卷官

刊性理易讀 府君以性理一書爲入聖階梯 讀者每苦其繁難於卒業曾見志遠堂所輯性理易讀最便後學講習惟通書四十章內節省數章殊失盡性立命之旨因照全本補入餘則

仍從原本重梓以傳之

八月署戶部尚書未旬日卸署任

派修朝陽等門及城牆各工期月報竣

派覆覈朝審

十月充考試漢中書閱卷大臣

十二月復署戶部尚書

會議山西營制 先是山西巡撫恒春奏請簡練精兵以節糜費收實效

上命府君偕恭親王大學士裕誠會同籌議奏言晉省

額設兵丁二萬二千八百餘名以地方之繁簡定額兵之多寡擇要安設立法本周承平日久武備廢弛將弁以操演爲具文兵丁以老弱充名數一旦有警潰敗堪虞今該撫擬請省垣設立專營練兵以三千爲限就全省各營酌量裁撥慎選勇敢文武員弁督率訓練厚養贍以專其心利器械以備其用勤操演以勵其力優犒賞以作其氣復加演登山越嶺各項技藝營兵不敷選擇卽於綏遠城滿營閒散揀選挑補務

全譜
三
期戰則必克守則萬全詳覈所議不爲無見惟
事屬更改舊章亟宜統籌全局所裁各兵於營
制有無窒礙所籌各餉於經費能否敷用且重
兵專駐省城有無顧此失彼之患裁兵幾及數
千有無單弱短缺之虞果能訓練有方悉成勁
旅誠爲有裨儻徒事空言毫無把握恐將來練
兵而兵仍不能用節餉而餉轉多虛糜是徒議
更張無濟實用於該省營伍大有關係應請令
該撫悉心體察各營實在裁汰兵丁若干節省

餉銀若干覆奏到日再行覈辦

上從之

奏議軍營糧臺薪水章程 先是署禮部侍郎
宋晉以糧臺支發薪水冒濫奏請明定糧臺減
給薪水章程

上敕部議至是奏言糧臺冒濫之弊積習相沿牢不可
破查軍需定例軍營文武官員各按品級大小
支給俸廉鹽糧馬乾馱折跟役等項從無酌給
薪水名目是薪水一項本干例禁而各路糧臺

年譜 卷四 四
竟敢明目張膽論品秩之崇卑定供支之多寡
將來奏銷時任意攤入物價人工無可稽覈侵
耗隱匿百弊叢生該署侍郎洞悉此弊而復請
明定章程自係未知例案果如所奏則匿不敢
報之款竟得公然減支於軍餉仍難覈實應請
嚴申例禁通飭各路糧臺嗣後如敢仍稱薪水
款項或改換名目任意浮支予者受者均按冒
濫軍需律從重治罪仍責令加倍賠繳抵充軍
餉以儆侵貪該署侍郎所請酌量減給之處應

無庸議至所稱官員領項請先開列清單三月
具奏一次臣等詳加酌覈糧臺一切用項均應
一體照辦請飭各路糧臺照督撫奏報糧價例
將領項用項各開一單每月具奏一次留備查
覈將來題銷到時稍有參差無難立見得

旨允從

咸豐四年甲寅六十八歲

正月會議新疆兵制並豫籌經費事宜 先是
陝甘總督易棠會同伊犁將軍參贊大臣烏魯

木齊都統葉爾羌參贊大臣遵議新疆兵制略
爲變通並覆奏部議豫籌經費十條

上敕軍機大臣會同戶部議奏言新疆南路八城及巴
爾楚克一處額設滿漢換防官兵按兵部現冊
覈算通計一萬二千一百餘名由伊犁烏魯木
齊派往者二千四百餘名由陝甘兩省派往者
九千七百餘名統兵員弁大小二百餘員內庫
車喀喇沙爾阿克蘇烏什四城均係五年更換
葉爾羌和闐喀什噶爾英吉沙爾四城及巴爾

楚克一處均係三年更換咸豐三年四月戶部
奏請將各城防兵概由伊犁烏魯木齊派往毋
庸派自陝甘並將三年更換之處一律定爲五
年原爲有裨經費而仍無損邊防且可藉此裁
復陝甘綠營舊額茲據該督等會議覆奏臣等
悉心酌覈如伊犁將軍奕山等所稱綠營官兵
原額無多錫伯索倫二營官兵亦不敷調遣察
哈爾額魯特等營官兵與回疆不甚相宜均係
實在情形惟有於滿洲營內添派防兵二百名

覈其領項雖比綠營稍優而較之內地程途已
爲節省應如所議辦理又烏魯木齊都統樂斌
所稱綠營存城兵僅止三千六百餘名滿洲營
存兵僅止四千有零擬派綠營兵一千二百名
滿洲營兵三百名惟檢查兵冊該處綠營之額
四倍於伊犁除去換防屯田尙有官兵六千名
以地形而論東接哈密南環戈壁北連蒙古西
界伊犁郡縣相望無外夷窺伺之患儘可將換
防之數酌量多派卽滿洲營兵據兵部冊造實

有六千餘名自應再令多派以減內地調撥之
數其現在擬派之一千五百名應令詳晰聲敘
分撥某城若干及道里遠近以憑稽覈節省之
數又葉爾羌參贊大臣德齡所稱葉爾羌喀什
噶爾烏什阿克蘇四城共可減防兵一千六十
二名其三年更換之處除喀什噶爾外皆可改
爲五年聲敘殊不明晰其所稱防兵名數覈之
現冊多不盡合究竟除去添派裁減之數實應
由內地派換若干摺片各相歧異應令該將軍

等除現議之添派兵一千七百名裁減兵一千六十二名先行准辦外其如何再行添派及如何統改年限之處仍由烏魯木齊都統葉爾羌參贊大臣覈實查辦會同伊犁將軍陝甘總督詳細覆奏至告留兵丁悉數抵充及就近募補易防爲眷各情實於撥調經費大有裨益應卽准其照辦其裁復陝甘兩省額兵應俟該督查明具奏後再由戶部覈議此時粵匪滋擾徵調較多所有內地換防擬請一概暫停派往防兵

如有缺額卽於現減各兵內挑補挑補全完卽由告駐各兵內酌留告駐無人卽行就近招募作爲眷兵統俟軍務告竣後查明實缺若干再由內地派往似此一轉移間邊防內地兵額兩無虧缺卽伊犁烏魯木齊添派無多亦可無虞缺乏統計每年所省兵餉實不下數十萬兩豫調各城經費儘可確覈扣除裨益實非淺鮮

上從之

又奏豫籌新疆節省經費 略言兵制之變通

全言 卷四
利益垂於久遠經費之節省補救切於目前原
議如酌提封儲銀兩抵用實存銀錢糧石估變
物料催報應完款項皆卽其所本有者移緩就
急而採銅鑄錢開墾捐輸則又於無可設法之
中力求接濟之道該將軍等果能悉心籌畫於
歲需經費節省何止數十萬現在伊犁烏魯木
齊葉爾羌阿克蘇實存及封儲銀兩業經先後
奏明酌提動用其阿克蘇和闐喀喇沙爾庫車
英吉沙爾葉爾羌烏什喀什噶爾英吉沙爾九

處或將實存銀兩現議抵調或將實存錢文加
成搭放或將實存糧石搭放折放或請變糶充
餉或請勸諭捐輸或請售變或請停調而伊犁
烏魯木齊兩處所存最多轉形推諉應請

飭下該將軍都統大臣查照戶部原議實力籌辦並
將如何搭放抵充之處勒限先行咨報內地以
便確覈數目減調經費其各省協餉仍由戶部
從嚴催解不准因有新疆節省之條稍滋延宕
得

旨如所議行

二月會議變通鈔法章程 先是克勤郡王慶
惠奏鈔法弊端亟應杜絕御史伍輔祥奏在京
各衙門不收鈔票將銀買抵並請兵餉給鈔准
換大錢

上敕軍機大臣會同戶部議奏言各衙門拒鈔不收以
銀買抵種種情弊勢所不免應如所奏請

飭下吏部刑部分別嚴定京外收鈔各衙門官員通
同作弊縱容失察加重處分胥吏勒指刁難全

索實銀私自抑價買鈔轉抵罪名設立專條妥
速定議具奏後卽由戶部分別行文出示曉諭
如有前項情弊並許交納之人據實首告其偽
造寶鈔首從及知情行使罪名先經刑部議定
亦應一併出示並聲明不罪誤用之人免生疑
畏所期令行禁止上下周知俾官吏有所懲創
則商民自樂於通行至御史伍輔祥所稱請以
抵放兵餉寶鈔准其赴局換取當十大錢一節
無論大錢不敷備換且一經准取大錢商民必

紛紛赴局遞換勢必以整易散徒撓錢法無濟
民用事屬窒礙難行得

旨允從

四月

派修朝陽門外大通橋上號房及圍牆等工

五月卸署戶部尙書任

七月先伯母金太恭人卒於堂兄相任所

八月

派覆覈朝審

十月孫承熊生不孝桐出

十二月以捐輸軍需奉

旨優敘

進

乾清宮

賞福字自後歲以爲常不復書

咸豐五年乙卯六十九歲

六月堂兄相卒於浙江衢州防所府君聞之甚

悲憫其遺孤幼稚中年謝世未竟其用時粵匪

全譜 卷四 十一
方熾大江南北行旅皆有戒心府君函致韓媻
丈椿代爲經營身後事宜並促令速作歸計至
來年夏間先伯母暨先堂兄靈櫬安抵都門府
君心始稍慰府君待諸姪如己出皆量材成就
之堂兄相素謹厚有禮尤所鍾愛故始終成全
不遺餘力云

七月

孝靜康慈皇后升遐府君每晨入直齊集夜則直宿公
署與同官酌覈喪儀必詳必慎至

梓宮奉移淀園後始歸寓所

咸豐六年丙辰七十歲

正月與

乾清宮廷臣宴

賜御製詩

不孝彬 選補山東登州府同知

二月著中庸心法淵源成 府君自內召以來
部務較簡公餘卽以著述自娛因念中庸爲聖
門傳授心法恐學者泥於章句未明道原遂著

中庸心法淵源一卷至是成書

四月長孫承烜授室

八月不孝彬赴山東登州任

九月充武

殿試讀卷官

十一月不孝彬以捐輸米石由部議獎以知府

選用

十二月議覆考試生童經古用孝經出題作論

先是翰林院修撰張公之萬奏學政考試生

童經古請將孝經出題

上下其議時同列某謂非急務執意議駁府君曰此古

今風化之本若議駁是禁天下言孝也遂援筆

具疏略言孝經一書廣大悉備至德要道胥本

於此孔子言志在春秋行在孝經誠以孝爲百

行之原也我

朝孝治覃敷

列聖相承昌明經學

皇上道隆紹述

年譜 卷四 三
特命刊刻繙釋孝經闡天經地義之微端物則民彝
之本土子涵濡

教澤童蒙肄業自當身體力行若於考試經古以孝
經與性理一併命題則誦習切於身心化導先
於庠序於簡校詞藝之中寓考驗性情之實因
文既可見行移孝卽以作忠誠爲正本清原之
學應如該修撰所請於考試生童經古場將孝
經與性理出題作論其府縣考覆試前經臣部
議准以一場專考性理論應請一併添入孝經

論於培養人才轉移風化大有裨益

上從之

咸豐七年丁巳七十一歲

正月與

乾清宮廷臣宴

六月

萬壽節

賜宴於同樂園

十月著儒門三希成 府君以儒道未明多由

學者躡等以求不循階級因取周子士希賢賢
希聖聖希天三語列爲三門擇四子書中章句
分隸之並引伸其義務合體用一原顯微無閒
之旨書成約四卷名曰儒門三希

咸豐八年戊午七十二歲

二月

派修

泰東陵西朝房

昌陵西配殿等工

四月夷船闖入天津海口府君亟陳制夷之策
並訪聞廣東駐防紀世材精造器械密疏以

聞

六月

萬壽節

賜宴於同樂園

次孫 承煜 應童試入庠

曾孫 培芝 生

八月著感應樞機成 府君以世之學者薄感

年譜 卷四 三
應因果爲二氏之說乃援據經義闡明天道福善禍淫之理欲令人有所觀感警惕書成名曰

感應樞機

不孝桐 充順天鄉試同考官

次孫 承煜 授室

九月奉

命恭送

玉冊

玉寶前往

盛京尊藏府君時患痰飲以奉

命在先未敢乞假遂扶病啟行

十月差旋 府君力疾登程往返四十餘日途

中衝冒風寒又鮮醫藥旋京後困憊迥異平時

猶力疾覆

命跪拜如常回寓後乞假調理病頓增劇服藥罔效

十一月疾篤口授遺疏初六日未時醫來猶作

酬對語申時遂棄養越日遺疏上

諭曰禮部尙書徐澤醇人品端謹辦事老成由進士籤

分吏部蒙

皇考宣宗成皇帝恩遇簡放外任游擢封疆朕念其宣力有年特以禮部尙書內召服官中外典試禮闈均能勤慎宣勞克稱厥職茲以出差盛京感受微疾甫經兩次賞假方冀調理速痊遽聞溘逝軫惜殊深著賞給陀羅經被派貝子奕劻帶領侍衛十員卽日前往奠醊加恩照尙書例賜卹任內一切處分悉予開復應得卹典該衙門查例具奏伊子候選知府現任山東同知徐彬著俟服闋後以山東知府補用伊孫監

生徐承烜著賞給舉人一體會試以示朕篤念耆臣之至意欽此禮部以卹典請

賜祭葬如例內閣請諡

予諡曰恭勤

咸豐九年三月初二日謹奉府君靈柩卜葬於南東門外十八里淀新阡

賜同進士出身

誥授光祿大夫工部尙書門下士宗室瑞聯頓首謹填諱

附門下士祭文

維咸豐八年戊午十一月既望越十二日宜祭
之辰門下士宗人府主事麟書內閣協辦侍讀
陸履貞中書崔承之翰林院修撰孫如僅編修
呂朝瑞汪承元高延祐楊榮緒薛春黎梁肇煌
袁方城馬恩溥顏宗儀郭夢惠盧士杰王澎檢
討瑞聯詹事府左中允恩吉吏部郎中李淇主
事記名軍機章京靳邦慶主事宋良薰賈鐸田
景瀛果漢源謝膺禧曹會成紀暘四品頂帶戶

部郎中曹貽誠員外郎銜主事陳榮紹主事軍
機處行走朱學勤主事記名軍機章京蔡兆槐
主事任重光廖正亨程維清李廷簫王金臺陸
汝黼張文瀾邵涵蔣常垣歐陽雲師長灼張敬
生禮部主事任式坊林慶貽孫恩壽趙昌業黎
兆棠兵部郎中黃雲鵠員外郎顧敦敏主事王
炳壇王作孚刑部主事記名軍機章京張德容
主事張沅劉志沂包欣芳張煦張翀霄趙貢玉
杜田之徐忠銳鄧宗衡王袞吳榮李新莊傅起

巖敖册賢林式恭賴運揚工部郎中郝鐸主事
記名軍機章京杜來錫主事曹熾昌方騷王思
沂李慎候選員外郎尹耀宗貢士郭作霖謹以
剛鬣柔毛清酌庶羞之儀致祭於

誥授光祿大夫大宗伯徐老夫子大人之靈曰嗚呼
鉅儒濂洛名世皋夔生維降昴歿則騎箕

兩朝碩輔一代宗師哀榮兼備亦又何悲所可悲者親
炙之私典型共仰胡不慙遺溯

公誕降東海之湄幼鍾殊質長挺瓌姿入孝出

弟折矩周規稱公輔量於秀才時芹宮秀擷桂
籍香披禮闈屢試銓部克諧明符鏡照公比衡
持經綸夙裕內外咸宜巴渝出守播厥仁慈觀
風察吏厯轉監司湖湘陳臬法肅綱維開藩東
魯旋建牙旂總制西蜀威揚德綏

先皇簡畀特達之知

彤廷入覲

天子曰咨命典三禮夙夜惟寅翠纓彩煥

紫禁纒垂

隆禮優渥嘉謨載惟南宮典試珊網宏開焚香默告
爲

國求才門牆幸列光霽親依謂茲釋褐初志毋移
六曹庶務三館文詞各盡爾職誨渠永懷匪惟
盡職以道爲歸性天一貫儒門三希直揭宗旨
曲闡精微春風絳帳夜月緇帷剛柔兼克狂簡
胥裁方欣大匠成就菲材忽聞

簡命遼海驅馳禮成遄返拜手

丹墀不圖嬰疾和扁罔治臣躬盡瘁

帝眷攸毗遺章遽告

九陛歔歛親藩奠醑經被祿遺俾昌厥後

疊沛鴻施聲稱彌著道德堪思追維曩昔曷禁涕洟
願各砥礪無負訓辭魯場築野楚些興哀梁木
之痛曷有極哉尙饗

汪承元

嗚呼河嶽閒氣斗樞重臣士林模楷至誠經綸
胡台鼎兮屬望倏箕尾兮精淪懿吾

師之德業恆貫徹乎本原其品正其學純其植體

也如圭之肅其待物也如春之溫其宣力也禹
拜臯颺贊襄

聖治其敷政也西川東魯匡濟生民所由恭則不懈
於位勤則盡瘁其身荷

兩朝之知遇爲一代之完人方其騁步達路致身青雲
堂環節鉞履聽星辰容臺典禮瑣院衡文位高
而享彌厚遇隆而志彌伸胡爲乎淡泊甘儒素
清靜養天真衣披一品緣謝六塵巴蜀之水不
足喻其志之潔泰岱之鎮詎能方其體之尊人

知

公富貴不淫勵操持而守正孰知

公涵養有素葆德性而尊聞且夫主靜發於茂叔
良知闡於守仁

師則學宗乎舊緒衍其新釋通書之精蘊標粹語
於儒門性道之源流若揭樞機之感應如神本
先覺之訓迺誨後進以殷敦士無論乎識與不
識而皆願光風霽月之常親維承元之受知也
在昭陽赤奮若之春因文章之投契幸晉接乎

光顏謂樸直之可取乃逾格以陶甄既耳提而
面命用鏤襟而勒紳憶九秋兮侍教會叨飫乎
賓筵何數旬之睽隔竟痛失乎瞻韓惟

師行在

國史望重

朝端易名

予祭

綸綍頻頒固已備九五福之數綜三不朽之全而

承

元之所痛哭聲吞則以嘉言懿行耳濡目染於

大君子之門者而今而後其將疇遵奉

師教言啟發不易讀

師遺書闡揚其難惟有勤加省察勉勵持循期無
負吾

師知人之鑒與垂訓之恩總惟雲黯絳帳風寒冀
肝鬲兮來格庶靈爽兮如存哀哉尙饗

楊榮緒

咸豐八年歲在戊午嘉平月幾望門下士楊榮
緒敬告於

恭勤公大宗伯夫子大人之靈誄曰

嗚呼公之鉅業

國史自存公之清操輿頌能言敷歷中外發摛本原
莫可殫述難以具論維公之德措濂洛旨非予
小子能窺涯涘維公之學貫天人理非予小子
能見表裏維公之遇

三朝恩知眷禮終始無待置詞維公之福累葉留貽餘
慶引翼翮縷何爲心乎不忘惟公之教教也云
何舉隅高妙雖則高妙歸諸簡要循循善誘無

愚不肖昔歲癸丑受知之初韓門著籍得侍起居拜謁甫已授一卷書儒門法語俾正步趨教以入仕宜端初志人爵既得天爵毋棄名位大小聽其自至此心勿欺辨利與義自時厥後常坐春風所論非一其旨則同止水澄心璞玉治躬道德五千理該其中嗟予小子賦質朽鈍聞道不蚤求道不健過有叢積進無尺寸深負琢雕蕭蕭兩鬢今公薨逝受誨何由山頽木萎吾道悠悠迴思立雪事往情留駑駘不策曷企驂

騶鳴呼我公之心去來洞徹騎箕重霄精靈不滅敬循昔訓永守圭臬絳帳在望臨風涕屑

薛春黎

咸豐八年歲次戊午十有一月丁丑

大宗伯徐公墓於位

天子震悼諭賜奠醑祭葬如禮

特予諡曰恭勤於時有位於

朝者咸往哭臨門下士各爲文以侑奠全菜

薛春

黎
癸丑會試出

言言
公門受知最深無一言告

公之靈將有負名德且曷由自道其悲惟

公名門碩望趨善登仁悟徹人天闡明心性膺中外之鉅任而能以端樸移民俗以廉正飭官常以敦厚培士行荷

兩朝知遇之隆武緯文經功在

國家甚偉計服官四十年其卓卓可傳於後者將備載之

國史非門弟子之私言也古者大夫之才臨喪能

誄黎於古人無能爲役願以訓誨夙承義不敢

隱謹就平日得之提命者述惠紀實用布几筵其辭曰

嗚呼一代名儒

累朝著宿德位巍巍而逝何蹙於惟我

公胄緒鍾華生而孝友譽隆克家春秋上第蚤掇科名筮仕銓曹冰澈鏡清

先帝知人命守巴渝文翁治蜀先後同符迭轉監司民用康阜秉臬開藩勛猷彌茂嗟哉山左吏治久

言言
疲我

公建牙積弊迺釐晉督西川除莠安良猥匪咽匪
迹斂鴟張政成報最

天子嘉之命總春官邦禮攸司翠羽影纓紫纒縮騎鶴
禁趨踰靖共爾位歲在癸丑典試南宮秉心公
正如鑑斯空焚香選卷願得璠璣豈期博採辱
收硯硖黎穴於文

公曰才長黎瘠於詩

公曰稜藏得卷咨嗟謂莫與匹黎魁一經尙爲黎

惜况有弱弟同列門牆猥擬軾轍見賞歐陽座
上春風頻年眷戀我學無成

公誨不倦授我法語貽我嘉言德性問學指示根

源楷模在望圭臬常留何意但化異香浮浮公

薨後室內遺章入告愴動
異香不散

天容恩綸稠疊式酬厥庸故事惟恭廣業惟勤易名典
重績紀司勳獨念鰥生夙親馬帳木壞山頽安
仰安放撰杖無時傳薪何日以文誄

公我恨無筆嗚呼哀哉

梁肇煌

維咸豐八年歲次戊午季冬丁巳日弟子 梁肇

煌 謹告於

恭勤公大宗伯老夫子大人之靈而爲之誄曰

維商傅巖出應列星維周申甫嵩嶽鍾靈大哉
夫子應運而生南州冠冕遠紹前型吁茶萬物臬
牢羣能義心清尙陰德耳鳴出秉節鉞入握文
衡爲國梁棟卓卓直聲騎箕天上備極哀榮
夫子之德淵深莫測和不逼同介不鄰刻如彼松

柏高標勁直如彼隋和精芒耀色貞夷粹溫廉
清恭默普渡慈航書傳藥石仙曹觀政古訓是
式恪慎且勤允釐厥職鴻才槃槃五馬赴官自
梁徂冀部民攀鞍監司游擢剔蠹除殘福星灼
耀蔀屋騰歡不剛不柔以猛以寬霜肅柏府日
朗薇垣平當治河永慶安瀾上達

刊

宸聰開府東藩經略巴蜀績炳范韓口碑溢路勛名不

帝思碩輔召還吉甫汝作秩宗總領祠部典禮考文昭

垂册府校士春官衡才公普桃李滋榮涵濡化
雨一代宗工永存規矩瞻仰門牆春風和煦恭
承

丹詔將事遼陽霏霏雨雪烈烈寒霜昕夕遄征道阻且
長勞積成瘁藥劑靡嘗月蝕東壁鄴侯云亡哲
人但化星彩韜光

上覽遺表輟樂愴傷哀功定謚渥荷

鸞章衮綈寵錫親藩奠觴隆施疊沛俾後熾昌百僚思
慕俎豆馨香嗟予小子

師範夙欽弱植菲材期許實深示我遺軌惠我良
箴植品勛學罔玷儒林言猶在耳用愴厥心恪
守訓辭勉勵素襟泰山其頽哀有餘音

黎兆棠

維咸豐八年十二月戊午心喪弟子

黎兆棠叩

頭哭奠

誥授光祿大夫故大宗伯徐恭勤公夫子大人之靈
嗚呼

公既膺一代之榮施胡不享百歲之期頤何關門

言言
之甫入竟泰岱之終頽

九重軫惜飾終備典矧執經受教者能不傷悲由郎官
而出守不十載而封圻值海宇之清晏正物力
之豐熙苟道力之靡定將堅白之磷緇及夫蜀
中人

覲一琴一鶴僅已如斯嗚呼噫嘻隆隆者未必皆可以

貨取要之處脂膏而不潤如

公亦希伊臣心之如水實

天鑒之在茲畀容臺而掌禮作模楷之人師嗟予小子

庸樗腐櫟亦且與珊瑚玉樹上貢

螭墀惟心期之默契故三年屬吏未嘗登堂耳語干

謁營私

公其或窺見此所以

陪京出使許附末於星麾當夫關雲夜黑塞月天低
剔殘檠於茅店晉小子以言詩曾日月之幾何
音容杖履空想像於三代之尊彝平生植躬於
儒證心於佛雖好談因果無非聖賢與人爲善
喚醒一世之貪癡今

公而長已矣小子固慟乎安仰安放而遙想夫西
川東魯措紳耆舊懷德而鐫墮淚之碑哀哉尙
饗

黃雲鵠

咸豐八年歲在戊午季冬月朔日壬寅越祭日

丁巳門人

黃雲鵠謹致祭於

誥授光祿大夫大宗伯徐恭勤公夫子大人之靈猗

歟

夫子爲

朝名宿爲世耆儒秉道植德靡明靡晦弗逸弗渝敦
仁悅義匪物是徇匪聲是沾自始志學服膺聖
訓咀味道腴歷官中外鴻猷式煥素蘊式剪致
身甲第銓曹蒞政敬飭廉隅一麾出守於夔子
國游職河渠載臬荆南載撫山左載督成都秀
民以迪莠民以格良民以蘇

帝曰欽哉汝久勞外予軫爾劬還爾京國授爾宗伯汝

嘏予俞雍容八載益亨厥德神人以愉越歲癸

丑

公司文枋我叨濫竽珮

公明德聆

公懿訓敬奉馳驅何期上帝招我元老奪我耆儒
公素嗜道皈心迦葉具體文殊其騎箕尾其歸淨
域其憇蓬壺典型云邈遺我多士曷範曷模
公毋棄我絮酒在列歸乎歸乎嗚呼哀哉尙饗

吳榮

維咸豐八年歲次戊午季冬月丁卯朔越祭日
庚寅門下士 吳榮 謹以香楮酒醴之儀致祭於

誥授光祿大夫大宗伯恭勤徐老夫子大人之靈曰
嗚呼國家之立必有碩德重望不隨俗爲俛仰
者以固元氣而重岩廊其存也不必有赫赫之
功而老成端慤之概足以儀型乎四方其歿也
則

聖主爲之震悼同列爲之感愴而况夙昔依歸之士能
勿涕泗而傍徨

公盛年通籍起家曹郎當其浮湛華省與物無競
固已含光隱曜不言而自芳泊乎出典大郡薦

先帝稔

陟監司則又風發雷動勤求民隱而所部稱良

公才可大用故歷試之陳臬開藩不十年而遂畀

以封疆至今齊魯之士巴蜀之民雖閱歲易紀

猶率

公之教思

公之德而寤寐弗能忘

公念成功宜退

陛見陳請謙讓未遑而

聖心嚮用命掌邦禮乃復得禁近之迴翔猶憶癸丑

公主禮闈得人稱盛榮亦倖廁乎門牆及撤棘旅

見瞻

公德度則山泰岱而水黃河者如潁濱之遇歐陽

公風采嚴正訓誨周詳諄諄然謂文章爲餘事而

後此致力者尤在立身之本經世之長屬榮謁

假歸楚連歲阻兵閱四年再拜

公於京邸則又幸

公神明如故而

言詩
公亦語榮適有耳疾外是亦不遜人以精強
公愛

國之枕老而彌篤榮每歲時起居一語及天下之多
故伏莽之可虞則常愀然不樂若背有芒故三
年以來門下生春秋會飲請

公涖會

公必正色呵止謂此何時而燕樂飲酒猶未改乎
常

公之康強若此

公之篤斐若彼方且

朝野資爲柱石中外卜其行藏夫何未淹日月彼天
不弔遽嗟星隕而慟人亡嗚呼

公出爲邦伯入爲禮宗生有益於

國沒有傳於世已矣復何傷獨予小子感恩私之曲
逮悵函丈之淒涼蓋旣以爲天下慟而又以哭
其私者惟泣下而沾裳尙饗

附門下士輓詩

陸履貞

天邊光彩黯星辰

倚界心傷念老臣行儉立朝留亮節文翁化蜀憶深仁

恭勤

崇謚頒黃閣奠醊隆文降

紫宸經被陀羅堪證果佛天生出悟前因

出典巖疆數十秋生民感戴去思留令嚴霜肅
神姦格德布春溫愷澤流東海有賢思記籍岑
君遺惠尙歌謳恩威兼用欽神化千古高風孰
與儔
幾經拔擢到

神京調鼎殊勳屬老成宗伯儀型符眾望春官管
領萃羣英省添瑞柳昭神異庭茁芳蘭繼寵榮
太息台星沈北地幾番回首淚縱橫

新陰桃李滿門中衣鉢傳來未許同鶴駕有時
辭故郭鸞驂何日返神宮地臨

北闕恩先到人過西州涕不窮梁木興悲空景慕招
魂翦紙哭春風

瑞聯

正氣歸河嶽寒芒掩尾箕柏松彫晚歲蘭桂動

言言
長悲北斗名咸仰東流逝若斯

九重深悼惜百爾共嗟咨及嗣

醲恩被

酬庸異數施

聖皇懷碩輔

明詔尙凝思況在門牆列能無念想馳銜哀聊作誅感
遇勉裁詩忠厚蜚聲遠詩書裕後宜傳家誇積
善集蔭到吾師蕊榜叨榮耀銓曹慎職司清通
騰美譽簡要樹良規

丹宸賢類紀黃堂政有爲蜀邦歌愷悌晉省仰威儀南

國瞻刑措東山詠績熙封疆邀寄託惠澤到邊

陲葑屋誠心服茅檐徧口碑朝

天鸞詔荷入覲鶴琴隨典禮春官掌掄才玉尺持純臣

中外仰修士里閭推儉勵儒風候機參佛日時

悟禪同面壁好善謹毫釐慶積雙丁美經傳一

卷遺慈仁周族姓福蔭茂孫枝五福全堪羨千

祥集可知胡爲天詔下竟使哲人萎上品蓮臺

證真詮竹簡垂傳衣慙莫繼曳杖渺難追揮淚

珠拋點通微酒滿卮聊將哀慕意珥筆贅蕪詞

杜來錫

六載親師訓薰陶雅化融老成悲殂謝懿美溯
初終韶歲鍾殊質英年束禠躬讀書敦古處樂
善與人同孝友原家範文章本化工鴻才誠擢
秀鸚薦共稱雄蕊榜蜚聲遠銓曹藻鑑空蘊眞
存治體出守裕民功渤海勳名並湖湘事業豐
東藩歌保障西蜀荷幘幪

帝簡咨惟禮臣心敬在公寅清趨左掖典試領南宮夙

具冰壺朗咸歸鐵網中誨人嚴架獲講學述崆
峒絳帳追隨切緇帷道德崇方期資化雨長此
坐春風星隕寒箕尾峰顏慘泰崧遺章徵素抱
悼念動

皇衷酸奠

天恩渥

綸褒

主眷隆科名縣子舍經被表臣忠宗伯哀榮備鰥生教
澤蒙淒涼歌薤露零涕感何窮

聖主資良弼容臺隕大星

三朝知遇重冊載政聲馨姓字輝金榜詩聯在御屏科
名真不愧坊表並堪型門起于公第家傳韋相
經郎官初暎宿國器早升

廷碩望留

鸞掖清操著鶴廳一麾隨出守百鍊始開硎果有棠
陰布因之黍雨零虎蝗皆避宋樓觀每思邢豸
繡名卿服駢驂御史駟河干纔駐馬楚徼又揚

船保障連江浦波濤涉洞庭觀風時露冕冤雪
竟虛囿共食仁人福同懷君子刑慈雲回魯甸
卿月向齊坳吏察廉兼法流分渭與涇吹竽官
不濫滌籀志常惺暫喜襜帷住旋看使節停烏
羣環棨戟虎旅肅轅鈴登岱山同峻恬波海不
腥范韓專闔寄巴蜀頌聲聽拔異羣空馬懲姦
害去螟眞爲天下楷豈止太常銘

帝念塵三禮

恩綸召九齡景卿爭快覩喜起擬重聆表率侔山斗調

和賴鼎劔

螭頭方曳履箕尾忽歸靈遺愛羣生戀清風兩袖冷
鳳毛能濟美麟閣好圖形

誥捧天書紫勛垂史冊青耆臣蒙誅重

賜諡恭勤
綸音深為

惋惜繡佛贖燈熒渥荷

龍光錫

陀羅經被

諭賜祭葬並

派員奠醊

賞長悲馬帳肩公門備

桃李藥籠愧參苓遇為琴焦感言從棒喝醒每當

晉謁嘗談因果以示警惕刻彌欣沾化雨未許

有感應陰隲覺世金鑑等書測滄溟斑豈窺諸管鐘難擊以莛哀歌聞薤露

薄奠醑漿醺問字當年宅思賢異日亭祇今欽

渠獲灑涕望蒼冥



詩話

三

